

■ CURTAS ISTORGIAS DAVART LA DEMOCRAZIA (10)

La chasa federala illustrescha l'istorgia da la confederaziun

DA CORINA CASANOVA,
CHANCELIERA FEDERALA

L'ultima sessiun da Lstad è ida a fin ils 17 da zercladur 2011. Durant ils mais da stad èsi pli quiet en la chasa federala. Quai è in bun mument per ir a guardar in pau pli precis tge che questa chasa ans ha da quintar. Da la crappa che porta la chasa fin a las ovras d'art che la decorechan, tut quinta l'istorgia da la Svizra ed ans regorda a las valurs da la democrazia.

Traversond la piazza federala ans avischinain nus a la chasa federala, la chasa dal parlament svizzer. La fatschada principala cun sias quatter colonnas corinticas e la culmaina a piz fa pensar ad in tempel grec e cun quai als lieus nua che la democrazia è naschida. L'inscripziun latina inditgescha che questa chasa è ina «Curia». «Curia» era il num da la chasa dal senat da l'emprima republica sin quest mund, quella romana. Per tschientaners era la democrazia pratigada ina domena reservada als umens, las virtids dals umens da stadi vegnan dentant represchentadas da figuras femininas. L'indipendenza sa chatta cun ina bandiera auzada sin la culmaina. A dretga tschenta la pussanza legislativa cun in scut ed ina batgetta d'in meter, a sanestra sesa la pussanza executiva cun palpiri ed ina penna. En las nischas a dretga e sanestra da las colonnas stattan e sesan duas ulteriuras figuras femininas, la libertad e la pasch, tuttas duas armadas.



Ina chasa plain ovras d'art

A l'intern da la chasa federala vegnin nus beneventads da dus urs, per uschè dir ils represchentants da la citad e dal chantun ospitants. La via en la sala da la cupla maina speravi in paster che suna ina tiba ed in pestgader che bitta or sia rait. Davant nus vesain nus ils trais confederads. Els n'auzan betg lur mauns per engirar, ma ans preschantan il patg federal da l'entschatta avust dal 1291, l'emprim document federal. En il zenit da la cupla che cuverna la sala d'entrada stat la crusch svizra, circundada dal motto «In per tuts, tuts per in» e da la lingiada da las vopnas chantunalas. Il chantun Giura ch'è vegnì fundà blier pli tard ha ina posiziun speziala, siond che sia vopna n'ha betg pudì vegnir integrada en il rudè senza disturbar la simmetria.

Las salas dal cussegl naziunal e dal cussegl dals chantuns èn decoradas mintgamai cun in'enorma pictura. Il cussegl naziunal vesa durant sias debattas adina la tgina istorica da la Svizra, il prà dal Rütli cun il Lai dad Uri ed ils dus piz dal Mythen en il fund. Ina scena viva e colorada d'ina mastralia u d'in cu-

min intimescha las discussiuns dal cussegl dals chantuns. I dess anc blier da quintar davart las ovras d'art en la chasa federala. Jau As recumond il cudeschet «Das Bundeshaus in Bern» ed ina visita guidada en chasa federala. Quests exempels mussan dentant che la chasa federala illustrescha en moda fascinanta l'istorgia da la confederaziun e las valurs ch'èn sia basa.

La chasa federala – in luxus exagerà?

Favurisescha l'architectura la fortuna ed il bainstar dals umans che vivan en e cun ella? Per ils aderents d'ina nova chasa federala l'onn 1883 eri evident ch'ils cussegls da l'assemblea federala stuevan survegnir salas impressiunantas per influenzar positivamain lur fatschentas e debattas. Quest edificzi monumental na dueva betg esser mo ina chasa decorativa per las autoritads federalas, mabain manifestar la superbia e l'onur da l'entir pajais. Ils adversaris da la nova chasa federala vesevan en ella mo in luxus exagerà. I na dettia nagin basegn per ina nova chasa e las finanzas federalas na sajan n'er betg las meglras, quai eran lur arguments. Las cundiziuns da la citad da Berna e las purschidas ch'ella fetschia, tut quai saja propi pretendi da memia per la confederaziun. As vegnan questas discussiuns avant enconuschentas? Basta, en las proximas contribuziuns ans deditgain nus al cumbat electoral. Atras istorgias e la pussaivladad da commentar ellas datti sin mes blog en l'internet sut www.bk.admin.ch/chanceliera.